

**Sanaartornermi neqerooruteqartitsisarneq pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut**  
(Ineqarnermut, Attaveqarnermut Angallannermullu Naalakkersuisoqarfik)

**Saqqummiussineq  
Siullermeerneqarnera**

Ataatsimiinnermi kingullermi ilaatigut nunatsinni sanaartornermi piginnaangorsaanerup siuarsarneqarnissaanut, tassungalu ilanngullugu suliasaqarfiup iluani sulisunik ilinniartitsinissamut nutaanik suliniuteqarnissaq Naalakkersuisut sinnerlugit ilimasaarutigaa.

Suliniuummi tassani alloriarnertut siullertut matumuuna ”Sanaartornermi neqerooruteqartitsisarneq pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut”, ulluinnarni neqerooruteqartarnermut inatsimmik taaneqartartoq Naalakkersuisut saqqummiuppaat.

Pisortat neqerooruteqartitsisartut neqerooruteqartitsisartullu allat, neqerooruteqartarnermut inatsimmi aalajangersakkanut ilaasut suliasap tunniunneqarnerani inuiaqatigiit aningaasaqarnerannut tunngasunik – akigititaasoq kisiat isiginagu – pinngitsooratik ilaatitsarnissaasa annertunerulernissaa siunnersuummi siunertarineqarpoq. Neqerooruteqartitsisut neqeroorutinik nalilersuinerminni akiusoq kisiat pinnagu, aammali pissutsini allani neqerooruteqarnermut inatsimmut ilaatinneqareersuni periarfissanik atuinissamut pisussaaffilerneqarnerisigut tamanna pissaq. Assersuutigalugu pissutsit, soorlu illuliap naammassinerani pitsaassusaanut, avatangiisinut sunniutaanut allarpassuarnullu tunngasuusinnaapput.

Tassalu neqerooruteqartitsisup neqerooruteqartitsinissamik piareersaanerani neqerooruteqartut suliak akikinnerpaanissaat kisiat unammillissutigisinnaajunnaassavaat. Assersuutigalugu neqerooruteqartitsisup tamatuma saniatigut suliasap suliarineqarnerani ilinniartut amerlanerpaat atorfinitsinneqarnissaat piumasarisinnaassavaa. Ilinniartunik atorfinitsitsisarnerup unammillissutigitinneqartaleratigut neqerooruteqartut suliffeqarfinni ilinniarfissanik amerlanerusunik pilersitsinissamut kaammattorneqassapput.

Aamma pissutsit allat neqeroorutinik nalilersuinermut ilaatinneqarsinnaapput. Assersuutigalugu neqerooruteqartut innuttaasunut isumaginninnikkullu akisussaaffeqarnissaanut piumasaqartoqarsinnaavoq, takuuk Corporate Social Responsibility-mut (CSR) tunngaviusut. Entreprenørp suliffeqarfiani assersuutigalugu inuusuttunut inooqatigiinnikkut atugarliortunut ilinniarfissanik sulinermillu misiliinernik pilersitsisoqarsinnaavoq, sullivimmi avatangiisit isumannaallisaanerlu tullerriaartumik sulissutigineqarsinnaavoq, piginnaangorsaasoqarsinnaavoq aammalu ilinniartitseqqittoqartarsinnaalluni il.il.

Taamaattumik suliniuummi tassani alloriarneq tulleg – inatsisissatut siunnersuut naapertorlugu – tassaassaaq maleruagassanik sukumiisunik, sanaartugassanik neqerooruteqartarnermut

inatsimmi § 1, imm. 2-mi ilaatinneqartunik neqerooruteqartitsisoqartillugu inuiaqatigiit aningaasaqarneranni eqqarsaatigisassanik ilaatitsinissamut tunngaviliisussanik suliaqarnissaq.

Maleruagassani taakkunani ilaatigut pissutsit, soorlu nukissiuuteqarnermi pitsanngorsaanernut, avatangiisinik pitsanngorsaanernut, piginnaanngorsaanernut, ilinniartitaanernut, isumaginninnermut allanullu tunngasut neqeroorutitik nalilersuinermi – soorunami akit saniatigut – pingaartinneqartariaqartut aalajangersarneqassapput. Kiisalu maleruagassani aamma neqerooruteqartitsisut suliniutip inuiaqatigiit aningaasaqarneranni imminut akilersinnaanernut uppersaatitit pisariaqartinneqartunik pissarsisinaanissaa piumasarineqarsinnaavoq. Maleruagassat taakku siunnersuutip akuerineqarnerata kingorna suliarineqarsinnaassasut Naalakkersuisut naatsorsuutigaat.

Naalakkersuisut neriuutigaat suliniummi tassani Inatsisartunit tapersorsorneqarsinnaassallutik, aammalu siunnersuut aappassaanneeraneqannginnermini Inatsisartut Ineqarnermut Attaveqarnermullu Ataatsimiititaliaani suliarineqarnissaa inassutigalugu.

Taamatut oqaaseqarlunga ”Sanaartornermi neqerooruteqartitsisarneq pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut” Inatsisartuni suliassanngorlugu tunniuppara.